

Hasilkan pemindahan teknologi— Dr.M

'Pelaburan asing bantu tingkat kemahiran'

KUALA LUMPUR, Ahad

PELABURAN yang dikendalikan dengan sempurna di bidang pembuatan dapat menghasilkan pemindahan teknologi berharga di samping meningkatkan semua bentuk kemahiran bagi sebuah negara membangun seperti Malaysia, kata Datuk Sri Dr. Mahathir Mohamad.

Bahan asal dari Arkib
Negara Malaysia

Teknologi dan kemahiran ini akan akhirnya menjadi asas bagi keupayaan tempatan dan kemungkinan daya cipta asli, katanya semasa berucap di Majlis Makan Malam Tahunan Institut Jurutera Malaysia di sini semalam.

Timbalan Perdana Menteri berkata, dengan para pelabur asing mendirikan kilang-kilang pengeluaran yang sofistikated, rakyat tidak saja mendapat pekerjaan tetapi juga menghasilkan keluaran Malaysia yang asli.

"Hari ini kilang-kilang pembuatan kepunyaan asing boleh dikendalikan hampir keseluruhannya oleh kakitangan Malaysia," tambahnya.

Langkah selanjutnya, katanya, ialah bagi rakyat memulakan pengeluaran hasil yang direka dan perkas oleh mereka sendiri, dan ini telahpun berlaku di setengah bidang.

Datuk Sri Dr. Mahathir berkata, dasar perindustrian baru kerajaan mengadakan perusahaan berat, khususnya yang berkaitan dengan sumber semulajadi negara yang besar, tidak saja memerlukan penaungan pelaburan asing yang banyak di bidang kewangan, kejenteraan dan kelengkapan malahan peningkatan kemahiran profesyenal dan separa profesyenal.

Beliau menyeru para jurutera Malaysia melakukan segala usaha bagi memajukan lagi kepakaran dan kecekapan profesyenal mereka untuk membantu negara memajukan kemahiran separa-profesyenel tempatan.

Usahasama

Bagi tujuan ini, beliau menggesa jurutera Malaysia dalam sektor swasta sama ada perunding, pekilang atau kontraktor menimbang dengan serius mengadakan usahasama dengan rakan mereka dari negara maju.

Usaha ini merupakan satu dari cara yang paling cepat bagi mendorong pemindahan teknologi untuk memenuhi matlamat negara memajukan perusahaan berat dalam tempoh singkat dekad ini.

Beliau gembira kerana jurutera Malaysia, yang merupakan kumpulan profesyenal yang terbesar di negara ini, menjalankan segala usaha menerusi IEM, Majlis Jurutera Komanwel (CEC), dan Persekutuan Institut Jurutera Asia Tenggara dan Pasifik (FEISEAP) menyumbang kepakaran prosesyenal mereka bersama rakan sejawat di rantau ini bagi menolong menyelesaikan masalah yang penting dalam ekonomi dan politik negara-negara rantau ini.